

Na osnovu člana 12. i 14. Zakona o udruženjima i fondacijama (Službene novine FBiH broj 45/02) Osnivačka skupština Udruženja za istraživanje, edukaciju i razvoj „NIA“ sa sjedištem na adresi, Aleja Konzula br. 5, 72 270 Travnik na sjednici održanoj dana 23. 11. 2015 godine, donosi

S T A T U T

Udruženja za istraživanje, edukaciju i razvoj „NIA“

I OPĆE ODREDBE

Član 1.

Udruženje za istraživanje, edukaciju i razvoj „NIA“ sa sjedištem u Travniku na adresi Aleja Konzula br. 5, 72 270 Travnik (u daljem tekstu: Udruženje) je vanstranačko, slobodno, dobrovoljno i neprofitno udruženje koja radi na ostvarivanju programskih ciljeva i zadataka predviđenih ovim statutom.

Član 2.

Ovim Statutom, u skladu sa zakonskim propisima određuju se:

- Naziv i sjedište Udruženja;
- Ciljevi i djelatnost Udruženja;
- Zastupanje Udruženja;
- Organi udruženja,
- Ovlasti organa udruženja,
- Način imenovanja i opoziva organa udruženja,
- Trajanje mandata organa udruženja,
- Kvorum i pravila glasanja organa udruženja uključujući i pitanja o kojima se odlučuje kvalificiranom većinom,
- Oblik i sadržaj pečata udruženja;
- Sticanje i raspolaganje imovinom;
- Način donošenja finansijskog izvještaja o radu;
- Postupak donošenja Stauta, izmjena i dopuna Stauta i drugih općih akata Udruženja;
- Uvjeti i postupak za pripajanje, razdvajanje, transformaciju ili prestanak rada Udruženja;
- Pravila za raspodjelu preostale imovine u slučaju prstanka rada Udruženja;
- Druga pitanja od značaja za organizaciju i djelovanje Udruženja

Član 3.

Udruženje ima svojstvo pravnog lica.

II NAZIV I SJEDIŠTE UDRUŽENJA

Član 4.

Puni naziv Udruženja glasi: **Udruženje za istraživanje, edukaciju i razvoj „NIA“**

Skraćeni naziv Udruženja je: **UIR „NIA“**

Sjedište Udruženja je: Travnik, ulica Aleja Konzula br. 5, 72 270 Travnik.

Područje djelovanja Udruženja za istraživanje, edukaciju i razvoj „NIA“ je Kanton Središnja bosna/Srednjobosanski kanton.

III CILJEVI I DJELATNOST

Član 5.

- **Ciljevi:**

Organizovanje, razvoj, obavljanje i unapređenje naučnoistraživačkog i stručnog rada iz oblasti prirodnih, tehničkih, politehničkih, društvenih, medicinskih, biomedicinskih i humanističkih nauka, odnosno iz svih naučnih oblasti shodno važećoj klasifikaciji nauka prema naučnim oblastima;

Istraživanje i rješavanje kompleksnih zadataka iz oblasti djelovanja udruženja;

- **Djelatnost:**

Edukativna pomoć mladim članovima udruženja i drugim zainteresovanim pojedincima, grupama i institucijama o aktualnim pitanjima iz oblasti djelovanja udruženja;

Unapređenje naučnih disciplina iz oblasti djelovanja udruženja;

Prikupljanje i objavljivanje tekstova naučnoistraživačkog i stručnog rada iz oblasti djelovanja udruženja;

Ostvarivanje saradnje sa drugim srodnim Udruženjima u zemlji i inostranstvu kao i ostvarivanje drugih zajedničkih interesa članova udruženja u skladu sa osnivačkim aktom i Statutom udruženja;

Unapređenje naučnih disciplina iz oblasti djelovanja udruženja;

Bavljenje privrednom djelatnosti u skladu sa članom 4. Zakona o udruženjima i fondacijama (Službene novine FBiH 45/02).

IV ZASTUPANJE I PREDSTAVLJANJE UDRUŽENJA

Član 6.

Udruženje zastupa i predstavlja predsjednik Udruženja u skladu sa Zakonom i ovlaštenjima proisteklim iz Statuta i drugih normativnih akata Udruženje *za istraživanje, edukaciju i razvoj „NIA“*

Član 7.

Sve pravne radnje kao i zastupanje Udruženja pred državnim, federalnim, kantonalnim i općinskim organima, međunarodnim organizacijama, potpisivanje Ugovora u pravnim radnjama, kao i potpisivanje finansijskih naloga vrši i potpisuje predsjednik Udruženja.

Predsjednik Udruženja, može, posebnim aktom ovlastiti i drugo lice koje je član Udruženja da u ime i za račun Udruženja obavlja poslove i zadatke koji su od interesa za rad Udruženja.

Član 8.

Rad Udruženja *za istraživanje, edukaciju i razvoj „NIA“* kao i odgovornost za zakonitost rada Udruženja organizuju i snose: direktor Udruženja, predsjednik Udruženja i predsjednik Skupštine.

VI ORGANI UDRUŽENJA

Član 9.

Organi udruženja su:

- Skupština;
- Predsjednik Udruženja;
- Direktor Udruženja.

VI-I SKUPŠTINA UDRUŽENJA

Član 10.

Redovna Skupština se održava, po pravilu, jednom godišnje, a vanredna po potrebi.

Sjednicu Skupštine zakazuje predsjednik Skupštine.

Sjednicom skupštine predsjedava radno predsjedništvo od tri člana koje se sastoji od predsjedavajućeg koji je ujedno i predsjednik Skupštine.

Radno predsjedništvo bira se na period od četiri godine.

Nadležnosti skupštine je da:

1. Donosi Statut i njegove izmjene i dopune i druge akte određene statutom;
2. Daje saglasnost na pravne radnje poduzete u postupku osnivanja udruženja;
3. Ienuje i opoziva predsjednika i direktora Udruženja i radna tijela Skupštine;
4. Odlučuje o udruživanju u saveze, pripajanju, razdvajanju, transformaciji, prestanku rada i drugim statusnim promjenama Udruženja;
5. Odlučuje o drugim pitanjima iz svoje nadležnosti u skladu sa Zakonom.

Član 11.

Skupština Udruženja o svim pitanjima odlučuje nadpolovičnom većinom glasova prisutnih članova. Minimalan broj članova za kvorum Skupštine udruženja je nadpolovična većina od ukupnog broja članova Udruženja.

VI-II PREDsjedNIK UDRUŽENJA

Član 12.

Predsjednik Udruženja je izvršni organ Udruženja;

Predsjednika Udruženja bira Skupština Udruženja;

Predsjednik Udruženja izvršava odluke Skupštine udruženja;

Predsjednik Udruženja priprema i organizuje sve sjednice Udruženja;

Predsjednik Udruženja je u skladu sa Statutom i drugim normativnim aktima Udruženja, odgovoran za ostvarivanje ciljeva i zadataka Udruženja.

VI-III DIREKTOR UDRUŽENJA

Član 13.

Direktor Udruženja je izvršni organ Udruženja;

Direktora Udruženja imenuje skupština Udruženja na prijedlog predsjednika Udruženja;

Direktor Udruženja obavlja poslove kojima se ostvaruju ciljevi Udruženja a po nalogu predsjednika ili skupštine Udruženja.

VII PEČAT UDRUŽENJA

Član 14.

Udruženje ima pečat okruglog oblika prečnika 50 mm, u kome je latiničnim pismom ispisano Udruženje *za istraživanje, edukaciju i razvoj* „NIA“ i u centarlnom dijelu oslikan skraćeni naziv Udruženja **UIR „NIA“**. Ukoliko Udruženje posjeduje više pečata, svaki pečat se označava odgovarajućim brojem.

Način rukovanja pečatom i čuvanje pečata bit će regulisano posebnim aktom.

VIII OSTVARIVANJE, KORIŠTENJE I RASPOLAGANJE SREDSTVIMA UDRUŽENJA

Član 15.

Imovinu Udruženja čine:

Stечena prava, stvari i novac koje Udruženje stiče u skladu sa Zakonom i ovim Statutom.

Član 16.

Izvori sredstava za ostvarivanje programskih ciljeva i zadataka Udruženja su:

1. Članarina;
2. Dobrovoljni prilozi i pokloni;
3. Prihodi od donatora i sponzora iz zemlje i inostranstva;
4. Sredstva dodijeljena iz budžeta;
5. Prihodi stečeni kroz obavljanje privrednih djelatnosti u skladu sa članom 4. Zakona o Udruženjima i Fondacijama FBiH;
6. Drugi prihodi ostavreni u skladu sa zakonskim propisima i ovim Statutom.

Član 17.

O svim sredstvima kao i pokretnoj i nepokretnoj imovini Udruženje je dužno voditi odgovarajuću evidenciju u skladu sa Zakonom.

Sredstva se mogu koristiti, isključivo, za ostvarivanje programskih ciljeva i zadataka kao i za oblasti djelatnosti Udruženja.

Utrošak finansijskih sredstava udruženja vrši se u skladu sa finansijskim planom Udruženja.

Član 18.

Kontrolu finansijskog poslovanja Udruženja vrši Skupština Udruženja.

IX NAČIN DONOŠENJA FINANSIJSKOG IZVJEŠTAJA

Član 19.

Udruženje je dužno uredno voditi poslovne knjige u skladu sa prihvaćenim računovodstvenim principima i standardima i sastaviti finansijske izvještaje, u skladu sa važećim propisima.

Član 20.

Predsjednik Udruženja je dužan najmanje jednom godišnje, podnijeti Skupštini Udruženja Izvještaj sa podacima o imovini Udruženja, korištenju imovine, prihodima i rashodima Udruženja i drugim pitanjima od značaja za raspolaganje imovinom.

X ČLANSTVO U UDRUŽENJU PRAVA I OBAVEZE ČLANOVA

Član 21.

Član Udruženja dobrovoljno može postati svako fizičko lice državljanin Bosne i Hercegovine ili strani državljanin u skladu sa zakonskim propisima koji su važeći na teritoriji Bosne i Hercegovine, Federacije Bosne i Hercegovine i Kantona.

Član Udruženja dobrovoljno može postati i svako pravno lice koje obavlja privrednu djelatnost na teritoriji Bosne i Hercegovine u skladu sa važećim zakonskim propisima.

Član 22.

Članovi Udruženja mogu biti: redovni, kolektivni, počasni i donatori.

Redovni članovi plaćaju godišnju članarinu čiju visinu na prijedlog predsjednika Udruženja određuje Skupština udruženja.

Članovi donatori su fizička i pravna lica koji Udruženju poklanjaju pokretnu i nepokretnu imovinu.

Počasni članovi Udruženja su fizička ili pravna lica koji su posebno zaslužni za rad Udruženja a proglašava ih Skupština Udruženja.

Kolektivni članovi mogu biti preduzeća, ustanove i drugi pravni subjekti.

Član 23.

Procedura prijema u članstvo Udruženja kao i procedura isključenja iz članstva Udruženja regulisat će se posebnim aktom koji na prijedlog predsjednika Udruženja donosi Skupština Udruženja.

Član 24.

Članovi Udruženja imaju sljedeća prava i obaveze:

- Svi članovi Udruženja imaju sljedeća pravo i obavezu da shodno svojim mogućnostima učestvuju u svim akcijama kojim se ostvaruju programski ciljevi i zadaci Udruženja;
- Da biraju i da budu birani u organe i radna tijela Udruženja;
- Da podnose pismene i usmene prijedloge za unapređenje rada i razvoja Udruženja;
- Da ukažu na nepravilnosti u radu Udruženja i predlažu mjere za njihovo prevazilaženje;
- Da potpuno i tačno izvršavaju posebna zaduženja koja pred njih postave organi Udruženja;
- Da redovno plaćaju članarinu;
- Da budu informisani o radu Udruženja.

Član 25.

Članovi Udruženja su posebno obavezni da svojim radom i ponašanjem čuvaju ugled Udruženja.

XI POSTUPAK ZA IZMJENE I DOPUNE STATUTA I DONOŠENJE AKATA

Član 26.

Inicijativu za izmjene i dopune Statuta može podnijeti pismenim putem sa obrazloženjem svaki član Udruženja. Inicijativa se podnosi predsjedniku Udruženja.

Član 27.

Dostavljeni prijedlog za izmjene ili dopune Statuta predsjednik Udruženja dostavlja skupštini Udruženja najmanje 30 dana prije održavanja sjednice.

Skupština Udruženja odlučuje natpolovičnom većinom glasova ukupnog broja članova Udruženja o izmjenama ili dopunama stauta.

Član 28.

Pored Stauta, Skupština Udruženja može donositi i druge akte i to:

- Odluke
- Pravilnike
- Poslovnike

Akti Udruženja moraju biti saglasni sa zakonskim propisima i Stautom Udruženja.

Član 29.

Odluke, kao opći akti, donose se u slučajevima kada je to izričito utvrđeno zakonskim propisima i ovim Statutom, kao i drugim slučajevima kada se na opći način uređuju pitanja od značaja za ostvarivanje ciljeva Udruženja.

Član 30.

Pravilnikom se na opći način uređuju odnosi između članova Udruženja, kao i međusobni odnosi organa Udruženja u ostvarivanju njihovih nadležnosti.

Član 31.

Poslovníkom se bliže određuje način rada organa Udruženja u izvršavanju njihovih nadležnosti utvrđenih Stautom.

Član 32.

Originalni primjerci Statuta i općih akata Udruženja čuvaju se u arhivi Udruženja.

XII STATUSNE PROMJENE

Član 33.

Udruženje se može pripojiti drugom udruženju;

Udruženje se može razdvojiti na dva ili više udruženja;

Udruženje se može udruživati u saveze.

Član 34.

Odluku o pripajanju, razdvajanju ili transformaciji donosi Skupština Udruženja na prijedlog predsjednika Udruženja.

Član 35.

Udruženje može prestati sa radom dobrovoljno ili po sili Zakona.

Član 36.

Udruženje prestaje sa radom dobrovoljno, ako Skupština Udruženja dvotrećinskom većinom glasova svih članova donese Odluku o raspuštanju Udruženja.

Član 37.

Udruženje prestaje sa radom po sili Zakona na temelju Odluke o zabrani rada Udruženja.

Član 38.

Nakon prestanka rada izvršit će se popis imovine, sastaviti likvidacioni bilans, podmiriti zakonske i ugovorene obaveze, a ostatak imovine prenijeće se u dobrotvorne svrhe.

XIII JAVNOST RADA UDRUŽENJA

Član 39.

Rad Udruženja je javan.

Javnost rada Udruženja utvrđuje se na način utvrđen zakonskim propisima i ovim Statutom.

Član 40.

Organi Udruženja su dužni ovlaštenim predstavnicima sredstava informisanja da učine dostupnim podatke, informacije i isprave koje se odnose na rad Udruženja, osim onih podataka, informacija i isprava za koje je utvrđeno da predstavljaju poslovnu tajnu.

Predstavnici sredstava informisanja imaju pravo da prisustvuju sjednicama organa Udruženja i da izvještavaju o radu istih.

XIV ZAVRŠNE ODREDBE

Član 41.

Statut stupa na snagu danom donošenja na Osnivačkoj skupštini Udruženja.

Travnik 23. 11. 2015 godine.

Broj: 01-/15-NIA

PREDSJEDNIK SKUPŠTINE UDRURŽENJA

Amra Tuzović